

MENDRANZES


Fascia pert l 23% de ladins

A la fin de oril vegn dat fora i ejic del dombrament fat a la fin del 2021 che soscedea cruzie e discussion

L'é stat gran marevea te duta la region canche a la fin de oril l'ISPAT, Istitut de Statistica de la Provinzia de Trent, à dat fora i ejic de chela pèrt del dombrament de la popolazion che revèrda la mendranzes linguistiches e che à inom «rilevazion su la consistenza e la dislocazion territoriala di sentadins che partegn a la popolazions de lengaz ladin, mochen e zimber».

L dat disc avisa che la perzentuèla de la jent de Fascia che à declarà de partegnir a la popolazion de lengaz ladin la é passèda dal 81,7% al 58,4%. N gran smendrament che é stat vedù e comentà a na vida negativa o adertura con alarmism, e che à caraterisà ence dut l rest del Trentin col smendrament del 17% per i mochegn, del 16% per i zimbres e del 5% di declaré ladins te la Val de Non.

Sobito l'é stat uzà fora ence te la analisa de La Usc i problemes e i mudamenc de endrez de la rilevazion e la modalitèdes de analisa che risia de sfaussèr l dat.



La mapa de la rilevazion statistica di ladins tel Trentin del 2021.

Chel che é segur l'é che la partezipazion a la rilevazion é stata n muie mendra, defat demò l 68,3% di fascegn à responet al chestionèr e a mesurèr la perzentuèla de chi che se à declarà ladin anter chi che à responet se aessa l 85,46% de ladins. Resta da veder se la pecia partezipazion vegn da mencióna de volontà festidech di sentadins o da informazion no chièra. L'é enteressant dapò l dat su la cognoscenza linguistica: chiò la perzentuèla no la é sun duta

la popolazion ma demò su chi che à responet al chestionèr e la moscia che te Fascia l 93,3% i enten l ladin, l 81% i lo reiona, l 73,2% i lo lec e l 55,2% i lo scrif. Dassen n bon ejit, che disc che la scola de Fascia te chisc egn à fat n gran lurier.

Chesta e de outra conscidrazions é states portèdes dant ence te scontrèdes metudes a jir via per l an da l'Autorità per la mendranzes e dal Servije mendranzes de la PAT, e l'é stat palesà l dubie che n dombrament fat a chesta vida no l'aesse più gran significat per i ladins de Fascia.

Ai 16 de dezember a Trent l'é stat prejentà ence i ejic del rilevament Cimbri Ladin Mocheno (CLAM 2021), na enrescida su la situazion linguistica de la trei mendranzes del Trentin metuda a jir da la Provinzia con l'Università de Trent e i Istitut Culturai Ladin, Mochen e Zimber. I dac, segur più positives che chi che vegn fora dal dombrament, i é da poder veder sul sit CLAM 2021 (<https://cimbri-ladino-mocheno-2021.lett.unitn.it/>).